

angulis, non multum diuersificabit annum in qualitate sua, nisi forte dum uenerit ad angulos ascendentis. Et quando in anni initio fuerit in angulo a domino ascendentis, uidelicet in .4.7. & .10. ab eodem minor & debilior erit significatio sua, quam dum fuerit in angulis ab ascendente signo. Nec minus de Marte iudicabis secundum qualitatem suam, quem modo praedicto in angulis existentem, uel succedentibus, remissius tamen, in significatore rem elegeris, & sic de planetis alijs. Quorum etiam commistionem, & aspectuum reciprocationem, & in signis permanentiam considera. Aspice similiter Mercurium, qui si fuerit in medio caeli in signo aereo, significat diuersitatem magnam in aere, tonitrua magna, & crebra fulgura, maxime si aliqua infortunarum fuerit in angulo aliquo ab ipso Mercurio. Et adiuua te in hoc a parte aeris, & uentorum, faciendo hanc participem cum significatore ipso. Quod si fuerit cum parte eadem repertus, uel eiusdem domino, iudica ex eo, sicut ante diximus, per existentiam ipsius in angulo, & aspectus alios planetarum. Pars haec accipitur a loco Mercurij usque ad gradum domini domus in qua est, addendo de super gradus ascendentis, & proiicitur deinceps ab ascendente signo. & ubi finitus fuerit numerus, ibi est pars praedicta. quod si Mercurius fuerit in domo sua, accipe suosmet gradus usque ad ascendens, & proiice ab ascendente. Et tunc uide quomodo fuerit pars illa cum planetis, & secundum hoc iudica. Et illud quod diximus de introitu Solis in Arietem, hoc idem facies de ingressu ipsius in quamlibet quartarum Zodiaci. Similiter de ingressu Solis, & Lunae in quodlibet signorum duodecim. Tamen fundamentum & radix omnium praedictorum est ab ascendente conjunctionis, uel oppositionis quartarum anni, & a domino tunc ascendentis, & domino locorum ipsorum, quoniam quando isti fuerint in locis humidis & pluuiosis, significant pluuias, maxime si applicuerint planetis humidis, & pluuiosis, & si e contra, contrarium iudica.

Et scias quod quando planeta significator fuerit occidentalis, retrogradus uel parui motus, aut descendens in latitudine, uel in circulo suae augis, significat pluuias, & e contra. Item si fuerit combustus pluuias designat, praeter Martem, qui solus combustus pluuias minuit.

Scitur etiam dispositio aerea in pluuiis tonitruis, & coruscationibus ab introitu Solis in .20. gradum M. Nam si tunc Iuppiter, Venus, & Mercurius fuerint occidentales, aut retrogradi, iudica anno illo pluuias multas. Postmodum considera stellam Saturni, & Martis, quorum alter fortior sit, & quam societatem cum planetis, & Mercurio praesertim habuerit.

Albumasar partem diei assumit, quando Sol oritur die qualibet accipiendo gradus, qui sunt a Sole ad Saturnum, numerum illum proiciens a Luna & secundum locum, & naturam planetae aspicientis illum, in quo cadit numerus ipse, de die illo diiudicat, Et similiter ab ascendente introitus Lunae